





文心雕龍訓故卷之三

銘箴第十一

昔帝軒刻輿几以弼違大禹勒筍簏而招諫成湯盤  
盂著日新之規武王戶席題必戒之訓周公慎言於  
金人仲尼革容於欹器則先聖鑒戒其來久矣故銘  
者名也銘觀器必也正名審用貴乎盛德蓋臧武仲之  
論銘也曰天子令德諸侯計功大夫稱伐代夏鑄九牧  
之金鼎周勒肅慎之楛矢令德之事也呂望銘功於  
昆吾仲山鏤績於庸器計功之義也魏顆紀勲於景  
鐘孔惺表勤於衛鼎稱伐之類也若乃飛廉有石櫛





之錫靈公有蒿里之謚銘發幽石吁可恠矣趙靈勒  
跡於番吾秦昭刻博於華山夸誕示後吁可茂也詳  
觀衆例銘義見矣至於始皇勒岳政暴而文澤亦有  
疎通之美焉若班固燕然之勒張昶華陰之碣序亦  
盛矣蔡邕銘思獨冠古今橋公之鉞吐納典謨朱穆  
之鼎全成碑文溺所長也至如敬通雜器準矧戒銘  
而事非其物繁畧違中崔駰品物讚多戒少李尤積  
篇義儉辭碎著龜神物而居博奕之中衡斛嘉量而  
在白杵之末曾名品之末暇何事理之能閑哉魏文  
九寶器利辭鈍唯張載劔閣其才清采迅足駸駸後

發前至勒銘岷漢得其宜矣箴者所以攻疾防患喻  
鍼石也斯文之興盛於三代夏商二箴餘句頗存及  
周之辛甲百官箴一篇體義備焉迄至春秋微而未  
絕故魏絳諷君於后羿楚子訓民於在勤戰代已來  
棄德務功銘辭代興箴文委絕至揚雄稽古始範虞  
箴卿尹州牧二十五篇及崔胡補綴總稱百官指事  
配位鑿鑑可徵信所謂追清風於前古攀辛甲於後  
代者也至於潘勗符節要而失淺温嶠侍臣博而患  
繁王濟國子引廣事雜潘尼乘輿義正體蕪凡斯繼  
作鮮有克秉至於王朗雜箴乃寘巾履得其戒慎而



失其所施觀其約文舉要憲章戒銘而水火井竈繁辭不已志有偏也夫箴誦於官銘題於器名目雖異而警戒實同箴全禦過故文質確切銘兼褒讚故體貴弘潤其取事也必覈以辨其摛文也必簡而深此其大要也然矢言之道蓋闕庸器之制久淪所以箴銘異用罕施□代惟秉文君子宜酌其遠大焉

贊曰

銘實表器箴惟德軌有佩于言無鑒于水秉茲貞厲敬言乎履義典則弘文約爲美

校十三字

皇王大紀帝軒作輿几之箴以警宴安  
鬻子大禹爲銘於筍箴曰教寡人以道者擊鼓教

以義者擊鐘教以事者振鐸語以憂者擊磬

大戴禮師尚父曰臣聞以仁得之以仁守之其量

百世以不仁得之以不仁守之必及其世王聞書

之言惕若恐懼退而爲戒書於戶爲銘焉于牖爲

銘焉凡二十五章

孔子家語孔子觀后稷之廟有金人焉三緘其口

而銘其背曰古之慎言人也無多言多言多敗

荀子孔子觀於魯威公之廟有歌器焉問於守者

爲宥坐之器虛則歌中則正滿則覆嘆曰烏有滿

而不覆者哉

春秋左傳季武子以所得于齊之兵作林鐘而銘

魯功焉臧武仲曰非禮也夫銘天子令德諸侯言

時計功大夫稱伐今稱伐則下等也計功則借人

也言時則妨民多矣何以銘爲

春秋左傳王孫滿對楚子曰昔夏之有德遠方圖

物貢金九牧鑄鼎百物而爲之備

國語仲尼曰昔武王克商通道九夷八蠻肅慎氏

貢楛矢先王欲昭其令德之致遠也故銘其筥曰

肅慎氏之楛矢

墨子昔夏后開冶使飛廉折金於山以鑄鼎於昆



吾蔡邕銘論呂尚作周太師其功銘於昆吾之鼎  
 古文苑仲山甫鼎銘註竇憲北征南單于遺憲古  
 鼎其傍銘曰仲山甫鼎崔駰時為主簿因為之銘  
 國語昔克路之後秦來圖敗晉功魏顆以其身却  
 秦師於輔氏親止杜田其勲銘於景鐘  
 禮記衛孔悝之鼎銘曰公曰叔舅乃祖莊叔乃考  
 文叔躬恤衛國夙夜不懈民咸曰休哉公曰叔舅  
 予女銘若纂乃考服  
 史記蜚廉為紂石北方而報得石棺銘曰帝令處  
 父不與殷亂賜爾石棺以華氏  
 莊子衛靈公薨卜葬於沙丘掘之數仞得石槨洗  
 而視之有銘焉曰不馮其子靈公奪而里之  
 韓子趙主父令工施鈎梯而緣番吾刻疎人跡其  
 上廣三尺長五尺而勒之曰主父遊於此  
 韓子秦昭王令工施鈎梯而緣華山以松栢之心  
 為博箭箭長八尺棊長八寸而勒之曰昭王與天神  
 博於此  
 史記始皇二十八年東行郡縣上泰山立石封祠  
 祀刻石頌秦德焉而去  
 文選班固從竇憲北征過燕然山勒銘曰鑠王師

兮征荒裔勦凶虐兮截海外復其邈兮亘地界封  
 神丘兮建隆碣熙帝載兮振萬世  
 古文苑華陰堂闕碑銘張昶為北地太守段熲作  
 其首云嶽有五而華處其一瀆有四而河在其數  
 其靈也至矣蓋合祀河嶽之神也  
 蔡中郎集橋玄黃鉞銘帝命將軍秉茲黃鉞威靈  
 振耀如火之烈  
 蔡中郎集忠文朱公名穆字公叔延禧六年卒肆  
 其孤用作茲寶鼎銘載休功俾後裔永用享祀以  
 知其先之德  
 後漢書馮衍字敬通京兆杜陵人歷官司隸從事  
 以新陽侯事貶黜古文苑載衍車銘  
 後漢書崔駰字季伯涿郡安平人歷官長岑長古  
 文苑載駰尊銘襪銘  
 後漢書李尤字伯仁廣漢維人和帝時拜蘭臺令  
 文章流別尤自山河都邑至刀筆竿契無不有銘  
 而文多穢病  
 典論建安二十四年二月壬午魏太子丕造寶劍  
 三寶刀三七首三皆因姿定名其文云選茲良金  
 命彼國工精而煉之至於百辟恨不遇薛燭青萍



也

晉書張載父收為蜀郡太守載隨父入蜀過劍閣作銘刺史張敏見而奇之表上其文世祖遣使鑄石記焉

逸周書文傳解引夏箴云中不容利民乃外次呂氏春秋名類篇引商箴云天降災布祥并有其職

春秋左傳魏絳謂晉侯曰夏訓有之有窮后羿公曰后羿何如曰昔周辛甲之為太史也命百官箴王闕虞人之箴曰芒芒禹跡畫為九州在帝夷羿

冒於原獸忘其國恤而思其麀牡虞箴如是可不懲乎于是晉侯好田故魏絳及之

春秋左傳欒武子曰楚自克庸以來無日不討其國人而訓之箴之曰民生在勤勤則不置

漢書揚雄自序箴莫大於虞箴故作州箴又古文苑雌州箴九百官箴十六

古文苑揚雄九箴二闕後涿郡崔駰及子瑗臨邑侯劉騶除增補十六篇胡廣復繼作四篇總名百官箴

晉書溫嶠為太子太庶子獻侍臣箴畧云不以賢自盛不以貴為榮思有虞之蒸蒸尊周文之翼翼

晉書王濟字武子太原人歷官太僕文辭秀茂作國子箴

晉書潘尼字正叔中牟人岳從子也歷官著作郎作乘輿箴以為王者膺受命之期總萬機而撫四海簡群才而審所授孜孜於得人汲汲於聞過不敢指斥至尊故以乘輿名篇

魏志王朗字景興東海郡人歷官御史大夫所著奏議論記咸傳於世



誄碑第十二

周世盛德有銘誄之文大夫之材臨喪能誄誄者累也累其德行旌之不朽也夏商已前其詳靡聞周雖有誄未被於士又賤不誄貴幼不誄長在萬乘則稱天以誄之讀誄定謚其節文大矣自魯莊戰乘丘始及於士逮尼父卒哀公作誄觀其慙遺之切嗚呼之歎雖非駮作古式存焉至柳妻之誄惠子則辭哀而韻長矣暨乎漢世承流而作揚雄之誄元后文實煩穢沙麓撮其要而摯疑成篇安有累德述尊而闕畧四句乎杜篤之誄有譽前代吳誄雖工而他篇頗疎



豈以見稱光武而改矜千金哉傳毅所制文體倫序  
孝山崔瑗辨絜相參觀序如傳辭靡律調固誅之才  
也潘岳構意專師孝山巧於序悲易入新切所以隔  
代相望能徵厥聲者也至如崔駰誄趙劉陶誄黃並  
得憲章工在簡要陳思叨名而體實繁緩文皇誄末  
旨言自陳其乖甚矣若夫殷臣誄湯追褒玄鳥之祚  
周史歌文上闡后稷之烈誄述祖宗蓋詩人之則也  
至於序述哀情則觸類而長傳毅之誄北海云白日  
幽光霧霧杳冥始序致惑遂爲後式景而效者彌取  
於功矣詳夫誄之爲制蓋選言錄行傳體而頌文榮

始而哀終論其人也暖乎若可覲道其哀也悽焉如  
可傷此其旨也碑者埤也上古帝皇始號封禪樹石  
埤岳故曰碑也周穆紀跡于奔山之石亦石碑之意  
也又宗廟有碑樹之兩楹事止麗牲未勒勲績而庸  
器漸闕故後代用碑以石代金同乎不朽自廟徂墳  
猶封墓也自後漢以來碑碣雲起才鋒所斷莫高蔡  
邕觀楊賜之碑骨鯁訓典陳郭二文句無擇言周乎  
衆碑莫非清允其叙事也該而要其綴采也雅而澤  
清詞轉而不窮巧義出而卓立察其爲才自然而至  
孔融所創有慕伯喈張陳兩文辨給足采亦其亞也



及孫綽爲文志在碑誄溫王邵庾辭多枝雜桓彝一篇最爲辨裁夫屬碑之體資乎史才其序則傳其文則銘標序盛德必見清風之華昭紀鴻懿必見峻偉之烈此碑之制也夫碑實銘器銘實碑文因器立名事光於誄是以勒石讚勲者入銘之域樹碑述已者同誄之區焉

贊曰

寫實追虛碑誄以立銘德纂行文采允集觀風似面

聽辭如泣石墨鐫華頽影豈忒

校五字

禮記曾子問賤不誄貴幼不誄長禮也惟天子稱天以誄之諸侯相誄非禮也

禮記檀弓魯莊公乘丘之戰縣賁父御馬驚敗績賁父曰他日未嘗敗績而今敗績是無勇也遂死之圍人浴馬有流矢在白肉公曰非其罪也遂誄之春秋左傳哀公十六年孔丘卒公誄之曰昊天不弔不勲遺一老婢孛余一人以在位玃玃余在疚嗚呼哀哉尼父無自律

劉向列女傳柳下惠卒門人將誄之妻曰將誄夫子之德耶則二三子不如妾知之也乃誄曰夫子之不伐兮夫子之不竭兮又云夫子之諡宜爲惠兮

漢書王莽建國五年元后崩詔揚雄作誄曰太陰之精沙麓之靈作合於漢配元生成

後漢書杜篤字季雅京兆杜陵人大司馬吳漢薨光武詔諸儒誄之篤爲誄最高帝美之

後漢書蘇順字孝山京兆灞陵人和安間以才學拜郎中所著賦誄哀辭凡十六篇

潘黃門集楊荊州誄楊仲武誄馬汧督誄

後漢書劉陶字子奇濟北貞王之後除順陽長著書數十萬言



曹子建集文皇誄至客遠臣之眇眇兮感凶問以  
怛驚以下皆自陳之辭

後漢書北海靖王興齊武王伯升子也永平七年  
薨古文苑載傅毅此誄其文不全亦無白日幽光  
之語

穆天子傳天子觴西王母於瑤池遂驅升於奔山  
乃紀跡於奔山之石而樹之槐眉曰西王母之山  
禮記祭義祭之日牽牲入廟門麗於碑孫何亦云

碑非文章之名後人假以載其銘耳  
後漢書楊賜字伯獻太尉秉之子以通尚書侍靈  
帝講於華光殿中歷官太尉卒謚文烈蔡中郎集

司空文烈侯楊公碑文  
後漢書陳寔字仲弓潁川許人除太丘長蔡中郎  
集陳太丘碑文

後漢書郭太字林宗太原界休人以有道徵不應  
蔡中郎集郭有道林宗碑文

後漢書孔融字文舉魯國人孔子二十世孫歷官  
太中大夫所著詩頌碑文凡二十五篇

晉書孫綽字興公太原人歷官著作郎於時文士  
綽為其冠温王郤庾諸公之薨必綽為碑文然後

刊石  
晉書桓彝字茂倫譙國龍亢人歷官宣城內史在  
郡蘇峻反為其將韓晃所害綽為碑文



哀弔第十三

賦憲之謚短折曰哀哀者依也悲實依心故曰哀也

以辭遣哀蓋下淚之悼故不在黃髮必施天昏昔三

良殉秦百夫莫贖事均天橫黃鳥賦哀抑亦詩人之

哀辭乎暨漢武封禪而霍嬪去病暴亡帝傷而作詩亦哀

辭之類矣及後漢汝陽王亡崔瑗哀辭始變前戒然

履突鬼門恠而不辭駕龍乘雲仙而不哀又卒章五

言頗似歌謠亦彷彿乎漢武也至於蘇慎張升並述

哀文雖發其情萃而未極心實建安哀辭惟偉長差

善行女一篇時有惻怛及潘岳繼作實踵其美觀其



慮善辭變情洞悲苦叙事如傳結言摹詩促節四言  
鮮有緩句故能義直而文婉體舊而趣新金鹿澤蘭  
莫之或繼也原夫哀辭大體情主於痛傷而辭窮乎  
愛惜幼未成德故譽止於察惠弱不勝務故悼加乎  
膚色隱心而結文則事愜觀文而屬心則體奢奢體  
爲辭則雖麗不哀必使情往會悲文來引泣乃其貴  
耳弔者至也詩云神之弔矣言神至也君子令終定  
謚事極理哀故賓之慰主以至到爲言也壓溺乖道  
所以不弔又宋水鄭火行人奉辭國災民亡故同弔  
也及晉築虎臺齊襲燕城史趙蘇秦翻賀爲弔虐民

構敵亦亡之道凡斯之例弔之所設也或驕貴而殞  
身或狷忿以乖道或有志而無時或美才而兼累追  
而慰之並名爲弔自賈誼浮湘發憤弔屈體同而事  
覈辭清而理哀蓋首出之作也及相如之弔二世全  
爲賦體桓譚以爲其言惻愴讀者歎息及平章要切  
斷而能悲也此句疑揚雄弔屈思積功寡意深文畧  
故辭韻沉脆班彪蔡邕並敏於致語然影附賈氏難  
爲並驅耳胡阮之弔夷齊褒而無聞仲宣所制譏呵  
實工然則胡阮嘉其清王子傷其隘各志也襴衡之  
弔平子縟麗而輕清陸機之弔魏武序巧而文繁降



斯以下未有可稱者矣夫弔雖古義而萃辭未造萃  
過韻緩則化而為賦固宜正義以繩理昭德而塞遠  
割析褻貶哀而有正則無奪倫矣

贊曰

辭定所表在彼弱弄苗而不秀自古斯慟雖有通才

迷方告控千載可傷寓言以送

校九字

春秋左傳秦伯任好卒以子車氏之三子奄息仲  
行鍼虎為殉皆秦之良也國人哀之為之賦黃鳥  
詩交交黃鳥止於棘誰從穆公之子車奄息維此奄  
息百夫之特臨其穴惴惴其慄彼蒼者天殲我良  
人如可贖兮人百其身  
漢書霍去病元狩六年薨子嬪嗣嬪字子侯為奉  
車都尉從封太山暴病死漢武帝集嬪死上甚悼  
之乃自為歌詩

後漢書張升字彥真尉氏人以能守外黃令著賦  
誄頌碑凡六十篇

曹子建集行女哀辭云三年之中二子頓喪是子  
建之幼子也文章流別論建安中文帝與臨淄侯  
各失稚子命徐幹劉楨等為哀辭是備長亦有行  
女篇也

潘黃門集金鹿哀辭金鹿岳之幼子也又為任子  
咸妻作孤女澤蘭哀辭澤蘭子咸之女也

春秋左傳莊公十一年宋大水公使弔焉曰天作  
淫雨害於粢盛如之何不弔

春秋左傳昭公十八年五月宋衛陳鄭皆火陳不  
救火許不弔災

春秋左傳游吉相鄭伯如晉賀虎祁也史趙見子  
太叔曰甚哉其相蒙也可弔也而又賀之

戰國策燕易王初立齊宣王因燕喪而攻之取  
十城蘇秦為燕說齊王再拜而賀因仰而弔曰燕

雖弱小秦王之少壻也大王利其十城而與強秦  
為讐是食烏喙之類也齊王曰善歸燕之十城

漢書賈誼出為長沙王傳渡湘水因為賦以弔屈  
原



漢書武帝至長楊獵還過宜春宮相如奏賦以哀  
二世行失顏師古注宜春本秦之離宮胡亥於此  
為閹樂所殺故感其處而哀之  
漢書揚雄作書往往撫離騷文而反之自岷山按  
諸江流以弔屈原名曰反騷  
蔡中郎集弔屈原文□迥世而遙弔託白水而騰  
文  
魏志阮瑀字元瑜尉氏人為魏武管記室弔伯夷  
文余以王事適彼洛師瞻望首陽敬弔伯夷求仁  
得仁見嘆仲尼沒而不朽身滅名飛  
後漢書禰衡字正平平原般人弔平子文余今反  
國命駕言歸路由西鄂追弔平子張衡楚西鄂人  
陸士衡集弔魏武文悼總帳之冥冥怨西陵之茫  
茫登雀台而群悲貯美日其何望

### 雜文第十四

智術之子博雅之人藻溢於辭辭盈乎氣苑囿文情  
故日新殊致宋玉含才頗亦負俗始造對問以申其  
志放懷寥廓氣實使之及枚乘摘艷首製七發腴辭  
雲構本麗風駭蓋七竅所發發乎嗜欲始邪末正所  
以戒膏粱之子也揚雄覃思文閣業深綜述碎文瓌  
語肇為連珠其辭雖小而明潤矣凡此三者文章之  
枝派暇豫之末造也自對問以後東方朔效而廣之  
名為客難託古慰志疎而有辨揚雄解嘲雜以諧謔  
迴環自釋頗亦為工班固賓戲含懿采之萃崔駰達



旨吐典言之裁張衡應問密而兼雅崔寔客譏整而  
微質蔡邕釋誨體奧而文炳景純客傲情見而采蔚  
雖迭相祖述然屬篇之高者也至於陳思客問辭高  
而理疎庾敬客容意榮而文悴斯類甚衆無所取裁  
矣原茲文之設廼發憤以表志身挫憑乎道勝時屯  
寄於情泰莫不淵岳其心麟鳳其采此立本之大要  
也自七發以下作者繼踵觀枚氏首唱信獨拔而偉  
麗矣及傅毅七激會清要之工崔駰七依入博雅之  
巧張衡七辨結采綿靡崔瑗七厲植義純正陳思七  
啟取美於宏壯仲宣七釋致辨於事理自桓麟七說

以下左思七諷以上枝附影從十有餘家或文麗而  
義睽或理粹而辭駁觀其大抵所歸莫不高談宮館  
壯語畋獵窮瓌奇之服饌極蠱媚之聲色甘意挫骨  
髓艷詞洞覓識雖始之以淫侈而終之以居正然諷  
一勸百勢不自反子雲所謂先騁鄭衛之聲曲終而  
奏雅者也唯七厲叙賢歸以儒道雖文非拔群而意  
實卓爾矣自連珠以下擬者間出杜篤賈逵之曹劉  
珍潘勗之輩欲穿明珠多貫魚目可謂壽陵匍匐非  
復邯鄲之步里醜捧心不關西施之頻矣唯士衡運  
思理新文敏而裁章置句廣於舊篇豈慕朱仲四寸



之璫乎夫文小易周思閑可瞻足使義明而辭淨事  
圓而音澤磊磊自轉可稱珠耳詳夫漢來雜文名號  
多品或典誥誓問或覽畧篇章或曲操弄引或吟諷  
謹詠總括其名並歸雜文之區甄別其義各入討論  
之域類聚有貫故不曲述

贊曰

偉矣前脩學堅多飽負文餘力飛靡弄巧枝辭攢映  
嘒若參鼎慕頌之心於焉祗攬

校十一字

文選楚襄王曰先生其有遺行與何士  
民衆庶不之甚也宋王對曰願大王寬其罪使  
得畢其辭

漢書東方朔上書欲求試用指意放蕩終不見用

朔因著論設客難已用位卑以自慰喻

漢書哀帝時丁傳董賢用事諸附離之者或起家

至二千石時揚雄方草太玄有以自守泊如也或

朝雄以玄尚白而雄解之號曰解朝

後漢書班固自以二世才術位不過郎感東方朔

揚雄自論以不遭蘇張范蔡之時作賓戲以自通

後漢書崔駰常以典籍為業未遑仕進之事或譏

其太玄靜將以後名失實駰擬解朝作達旨以答

後漢書張衡不樂當世所居之官輒積年不徙自

去史職五載復還乃設客問作應問以見其志

後漢書蔡邕閑居玩古不交當世感東方朔客難  
及揚雄之徒設疑以自通乃斟酌群言躡其是而  
矯其非作釋誨以戒厲云爾

晉書郭璞好卜筮縉紳多笑之文自以才高位卑  
乃著客傲後漢書傅毅以顯宗求賢不篤士多  
隱處故作七激以諷後漢書桓麟字元鳳桓帝  
初為議郎文章志麟文十八篇有七說一首  
後漢書賈逵字景伯扶風平陵人歷官中郎將  
後漢書劉珍字秋孫南陽蔡陽人歷官衛尉著誄  
頌連珠傳於世



莊子秋水篇且子不聞壽陵餘子之學行於邯鄲  
與未得國能反失其故行矣直匍匐而歸耳  
莊子天運篇西施病心而曠其里里之醜人見而  
美之歸亦捧心而曠其里之富人堅閉門而不出  
貧人携妻子而走  
列仙傳朱仲者會稽市販珠人魯元公主以七百  
金從仲求珠仲乃獻四寸珠而去不知所之

諧譏第十五

芮良夫之詩云自有肺腸俾民卒狂夫心險如山口

壅若川怨怒之情不一歡譁之言無方昔華元棄甲

城者發睥目之謳臧紇喪師國人造侏儒之歌並嗤

戲形貌內怨爲俳也又蠶解鄙諺貍首淫哇苟可箴

戒載于禮典故知諧辭譏言亦無棄矣諧之言皆也

辭淺會俗皆悅笑也昔齊威宣酣樂而淳于說甘酒楚

襄讌集而宋玉賦好色意在微諷有足觀者及優旃孟

之諷漆城優孟旃之諫葬馬並譎辭飾說抑止昏暴是

以子長編史列傳滑稽以其辭雖傾回意歸義正也



但本體不雜其流易弊於是東方枚臯舖糟啜醢無  
所匡正而詆嫚嬉弄故其自稱爲賦廼亦俳也見視  
如倡亦有悔矣至魏大因俳說以著茂書薛綜憑宴  
會而發嘲調雖抃推席而無益時用矣然而懿文之  
士未免枉轡潘岳醜婦之屬束皙賣餅之類尤而效  
之蓋以百數魏晉滑稽盛相驅扇遂乃應瑒之鼻方  
於盜削卯張華之形比乎握春杵曾是莠言有虧德  
音豈非溺者之妄笑胥靡之狂歌歟譎者隱也遜辭  
以隱意譎譬以指事也昔還楊求拯於楚師喻智井  
而稱麥麴叔儀乞糧於魯人歌佩玉而呼庚癸伍舉

刺荆王以大鳥齊客譏薛公以海魚莊姬託辭於龍  
尾臧文謬書於羊裘隱語之用被千紀傳大者興治  
濟身其次彌遠曉惑蓋意生於權譎而事出於機急  
與夫諧辭可相表裏者也漢世隱書十有八篇歆固  
編文錄之歌末昔楚莊齊威性好隱語至東方曼倩  
尤巧辭述但謬辭詆戲無益規補自魏代已來頗非  
俳優而君子隱化爲謎語謎也者迴互其辭使昏  
迷也或體目文字或圖象品物纖巧以弄忠淺察以  
衍辭義欲婉而正辭欲隱而顯荀卿蠶賦已兆其體  
至魏文陳思約而密之高貴鄉公博舉品物雖有小



巧用乖遠大夫觀古之為隱理周要務豈為童稚之  
戲謔搏髀而抃笑哉然文辭之有諧隱譬九流之有  
小說蓋稗官所采以廣視聽若效而不已則髡袒而  
入室旃孟之石交乎

贊曰

古之嘲隱振危釋憊雖有絲麻無棄菅蒯會義適時

頗益諷誠空戲滑稽德音大壞

校十一字

三卷共校四十九字

詩桑桑維彼不順自獨俾臧自有肺腸俾民卒狂

詩傳芮伯刺厲王之詩

莊子孔子曰凡人心險於山川難於知天

國語召公曰防民之口甚於防川川壅而潰傷人必

多民亦如之

春秋左傳宋華元獲於鄭宋以兵車文馬贖之宋

城華元為植城者諺曰睥其目皤其腹棄甲而復

於思於思棄甲復來

春秋左傳臧孫紇救鄆敗於狐駘國人誦之曰臧

之狐裘敗我於狐駘我君小子侏儒是使侏儒侏

儒使我敗於邾

史記齊威王好為長夜之飲置酒後宮召淳于髡

賜之酒問曰先生能飲幾何而醉髡曰臣飲一斗

亦醉一石亦醉故曰酒極則亂樂極則悲萬事盡

然言不可極極之而衰以諷諫焉王曰善乃罷長

夜之飲

文選宋王登徒子好色賦序大夫登徒子侍於楚

襄王短宋王曰王為人體貌閒麗口多微辭又性

好色願王勿與出入後宮王曰至於好色臣無有

也

史記秦二世欲漆城優旃曰善漆城蕩蕩寇來不

可上即欲就之易為功耳頑難為陰室二世笑之

以其故止

史記楚莊王有所愛馬死欲以大夫禮葬之優孟

曰楚國之大何求不得請以人君禮葬之使諸侯

聞之知大王賤人而貴馬也於是王乃以馬屬太



漢書枚臯自言為賦不如相如又言為賦乃俳見  
視如倡自悔類倡也故其賦有詆娼東方朔又自  
詆娼其文

吳志薛綜字敬文沛郡竹邑人仕吳守謁者僕射  
蜀使張奉來聘綜嘲之曰有犬為獨無犬為蜀橫  
目勾身虫入其腹

文士傳束皙字廣微漢疎廣之後避難去疎之正  
為束氏曾著餅賦文甚俳諢

春秋左傳越圍吳趙簡子降于喪食使楚隆于吳  
吳王曰溺人必笑吾將有問也史黯何以為君子  
春秋左傳楚子圍蕭還無社號申叔展叔展曰有

麥麴乎曰無曰有山鞠窮乎曰無曰河魚腹疾柰  
何曰目於眚井而拯之

春秋左傳哀公會吳子夫差於黃池吳申叔儀乞  
糧於公孫有山氏而歌曰佩玉薺兮余無所係之  
旨酒一盛兮余與褐之父聵之有山氏曰若登首  
山以呼曰庚癸乎則諾

史記楚莊王即位三年不出號令伍舉曰願有進  
隱有鳥在臯三年不蜚不鳴此何鳥也王曰三年  
不蜚蜚將冲天三年不鳴鳴將驚人舉退矣吾知  
之矣

史記靖郭君將城薛曰母為客通齊人有請見者  
曰臣請三言而已客趨而進曰海大魚

列女傳楚莊姬上隱語於王曰大魚失水有龍無  
尾播欲內崩而王不視

列女傳臧文仲使於齊齊拘之文仲微使人遺公  
書謬其辭曰歛小器置諸台食獵犬組羊裘琴之  
合甚思之母見書而泣曰吾子拘而有木治矣

史記齊威王之時喜隱  
賦苑荀卿蚕賦通篇皆形似之言至末語始云夫  
是之謂蚕理



文心雕龍訓故卷之三終

楊國俊寫  
魏文良刻

文心雕龍訓故卷之四

史傳第十六

開闢草昧歲紀綿邈居今識古其載籍乎軒轅之世  
史有倉頡蒼主文之職其來久矣曲禮曰史載筆左右  
使之記已者左史記事者右史記言者言經則尚書  
事經則春秋唐虞流于典謨商夏被于誥誓洎周命  
維新姬公定法紂三正以班曆貫四時以聯事諸侯  
建邦各有國史彰善癉惡樹之風聲自平王微弱政  
不及雅憲章散紊彝倫攸斁夫子閔王道之缺傷斯  
文之墜靜居以歎鳳臨衢而泣麟於是就大水師以正



雅頌因魯史以修春秋舉得失以表黜陟徵存亡以  
標勸戒褒見一字貴踰軒冕貶在片言誅深斧鉞然  
睿旨存亡幽隱經文婉約丘明同時實得微言乃原  
始要終創爲傳體傳者轉也轉受經旨以授其後實  
聖文之羽翮記籍之冠冕也至從橫之世史職猶存  
秦并七王而戰國有策蓋錄而弗叙故卽簡而爲名  
也漢滅嬴項武功積年陸賈稽古作楚漢春秋爰及  
太史談世惟執簡子長繼至甄序帝勅比堯稱典則  
位雜中賢法孔題經則文非元聖故取式呂覽通號  
曰紀紀綱之號亦宏稱也故本紀以述皇王列傳以

總侯伯八書以鋪政體十表以譜年爵雖殊古式而  
得事序焉爾其實錄無隱之旨博雅弘辨之才愛竒  
反經之尤條例踳落之失叔皮論之詳矣及班固述  
漢因循前業觀司馬遷之辭思實過半其十志該富  
讚序弘麗儒雅彬彬信有遺味至於宗經矩聖之典  
端緒豐贍之功遺親攘美之罪徵賄鬻筆之愆公理  
辨之究矣觀夫左氏綴事附經間出於文爲約而氏  
族難明及史遷各傳人始區詳而易覽述者宗焉及  
孝惠委機呂后攝政史班立紀並違經實何則庖犧  
以來未聞女帝者也漢運所值難爲後法牝雞無晨



武王首誓婦無與國齊桓著盟宣后亂秦呂氏危漢  
豈唯政事難假亦名號宜慎矣張衡司史而惑同遷  
固元年二后欲爲立紀謬亦甚矣尋子弘雖僞要當  
孝惠之嗣孺子誠微實繼平帝之體二子可紀何有  
於二后哉至于後漢紀傳發源東觀袁張所制偏駁  
不倫薛謝之作疎謬少信司馬彪之詳實華嶠之準  
當則其冠也及魏代三雄紀傳互出陽秋魏畧之屬  
江表吳錄之類或激抗難徵或疎闕寡要唯陳壽三  
志文質辨洽荀張比之於遷固非妄譽也至於晉代  
之書繫乎著作陸機肇始而未備王韶續末而不終

于寶述紀以審正得序孫盛陽秋以約舉爲能按春  
秋經傳舉例發凡自史漢以下莫有準的至鄧粲晉  
紀始立條例又撮畧漢魏憲章殷周雖湘川曲學亦  
有心典謨及安國立例乃鄧氏之規焉原夫載籍之  
作也必貫乎百姓被之千載表徵盛衰殷鑑興廢使  
一代之制共日月而長存王霸之跡並天地而久大  
是以在漢之初史職爲盛郡國文計先集太史之府  
欲其詳悉於體國必閱石室啟金匱抽裂帛檢殘竹  
欲其博練於稽古也是立義選言宜依經以樹則勸  
戒與奪必附聖以居宗然後銓評昭整苛濫不作矣



然紀傳爲式編年綴事文非泛論按實而書歲遠則同異難密事積則起訖易疎斯固總會之爲難也或有同歸一事而數人分功兩記則失於複重偏舉則病於不周此又銓配之未易也故張衡摘史班之舛濫傅玄譏後漢之尤煩皆此類也若夫追述遠代代遠多僞公羊高云傳聞異辭荀况稱錄遠畧近蓋文疑則闕貴信史也然俗皆愛竒莫顧實理傳聞而欲備其事錄遠而欲詳其跡於是棄同卽異穿鑿傍說舊史所無我書則傳此訛濫之本源而述遠之巨蠹也至於記編同時同多詭雖定哀微辭而世情利害

勲勞之家雖庸夫而盡飾迤敗之士雖令德而常嗤理欲吹霜噴露寒暑筆端此又同時之枉可嘆息者也欲述遠則矯誣如彼記近則回邪如此析理居正唯素心乎若乃尊賢隱諱固尼父之聖旨蓋纖瑕不能玷瑾瑜也姦慝懲戒實良史之直筆農夫見莠其必鋤也若斯之科亦萬代一準焉至於尋繁領雜之術務信弁一作棄竒之要明白頭訖之序品酌事例之條曉其大綱則衆理可貫然史之爲任乃彌綸一代負海內之責而羸是非之尤秉筆荷擔莫此之勞遷固通矣而歷詆後世若任情失正文其殆哉



贊曰

史肇軒黃體備周孔世歷斯編善惡偕總騰褒貶

萬古覓動辭宗丘明直歸南董

校十七字

叙世本注黃帝之世始立史官倉頡沮誦居其職矣

禮記動則左史書之言則右史書之書甘誓怠棄三正蘇氏謂子丑寅之正

史記陸賈楚人以客從高祖定天下索隱陸賈撰記項氏與漢高祖初起之事名楚漢春秋

漢書司馬喜生談談為太史公仕於建元元封之間有子曰遷談卒三歲而遷為太史令

史記呂不常陽翟人始皇立尊不常為相國號稱仲父不常招致士厚遇之使客人人著所聞為八覽六論十二紀

後漢書班彪字叔皮扶風人王莽之亂避地河西依竇融光武召補徐令

漢書司馬遷贊至於采經摭傳分散數家之事甚

多疏畧或有牴牾又其是非頗謬於聖人然自劉向揚雄博採群書皆稱遷有良史之才不虛美不

隱惡故謂之實錄史通班固受金而方書陳壽借米而始傳

史記呂后本紀惠帝以戚夫人事因病歲餘不能起崩太子立為皇帝號令一出太后帝壯出怨言

太后幽殺之立常山王義為帝更名曰弘不稱元年者以太后制天下事也文帝立大臣以非孝惠

子誅之書牧誓古人有言曰牝雞無晨化雞之晨惟家之

索春秋穀梁傳蔡丘之盟曰毋使婦人與國事史記秦昭襄王母楚人姓芣氏號宣太后又匈奴

傳云時義渠戎王與宣太后亂有二子後漢書張衡上疏以王莽本傳但應載篡事而已

至於編年月紀災祥宜為元后本紀漢書平帝崩時元帝世絕而宣帝曾孫有見王五

人莽惡其長大曰兄弟不得相為後乃選玄孫中最幼廣戚侯子嬰年二歲託以為卜相最吉立之

杜氏通典東京圖書悉在東觀故使名儒碩學入直其中撰述國史



隋書經籍志晉秘書監袁山松後漢書九十五卷  
張璠後漢紀三十卷晉散騎常侍薛瑩後漢記六  
十五卷吳武陵太守謝承後漢書一百三十卷  
晉書司馬彪字紹統高陽王睦之子太始中仕秘  
書郎起世祖終孝獻為紀志傳凡八十篇名續漢  
書

晉書華嶠字叔駿高唐人惠帝元康中轉秘書監  
嶠以漢紀煩穢復作後漢書

通志藝文畧孫盛魏氏春秋二十卷魚豢魏畧五  
十卷張勃吳錄三十卷

晉書虞溥字允源高平昌邑人歷官鄱陽內史撰  
江表傳

晉書陳壽字承祿蜀巴西人歷官著作郎撰魏吳  
蜀三國志張華深善之曰當以晉書相付耳無遷

固之語華嶠傳嶠書成時中書監荀勗等咸以嶠  
文直事核有遷固風

晉書元康二年詔著作舊屬中書令秘書既典文  
籍宜改為秘書著作于是改隸秘書著作郎一人

謂之大著作專掌史任  
通志陸機晉三祖紀四卷

南史王韶之字休泰琅邪人初為謝琰行軍參軍  
私撰晉安帝陽秋書成時人謂宜居史職除著作

佐郎使續後事訖義熙九年晉安帝崩  
晉書干寶字令升新蔡人王導薦之元帝領國史

著晉紀自宣迄愍凡二十卷  
晉書孫盛字安國太原人累遷秘書監著晉陽秋

詞直而理正世稱良史晉簡文宣鄭太后諱阿春  
故諱云陽秋

晉書  
鄧粲長沙人桓冲為荊州請為別駕粲以父騫有

忠信言而世莫知乃著元明紀十篇  
史通令升先覺遠述丘明重立凡例勒成晉紀鄧

孫以下遽躡其蹤史例中興於斯為盛  
漢儀注太史公武帝置天下計書先上太史獨相

後漢書張衡欲終成漢記上疏條上司馬遷班固  
所敘與典籍不合者十餘事

晉書傅玄任雖顯貴而著述不廢撰論經國九流  
及三史故事評斷得失各為區例名為傳子

史記孔子著春秋隱桓之間則章至定哀之際則  
微謂其切當世之文而周褒忌諱之辭也



春秋左傳崔杼弑莊公太史書曰崔杼弑其君崔  
子殺之其弟嗣書而死者二人南史氏聞太史盡  
死執簡以往聞既書矣乃還  
春秋左傳孔子曰董狐古之良史也書法不隱

### 諸子第十七

諸子者入道見志之書太上立德其次立言百姓之

群居苦紛雜而莫顯君子之處世疾名德之不章唯

英才特達則炳曜垂文騰其姓氏懸諸日月焉昔者

一作風力牧伊尹咸其流也篇述者蓋上古遺語而戰

代所記者也至鬻熊知道而文王諮詢餘文遺事錄

為鬻子子自肇始莫先於茲及伯陽陽識禮而仲尼訪

問爰序道德以冠百氏然則鬻惟文友李實孔師聖

賢並世而經子異流矣逮及七國力政俊又蠶起孟

軻膺儒以磬折莊周述道以翱翔墨翟執儉确之教



尹文課名實之符野老治國於地利騶子養政於天  
文申商刀鋸以制理鬼谷脣吻以策勲尸佼兼總於  
雜術青史曲綴以街談承流而枝附者不可勝筭並  
飛辨以馳術饜祿而餘榮矣暨于暴秦烈火勢炎岷  
岡而煙燎之毒不及諸子逮漢成普思子政讐校於  
是七畧芬菲流鱗萃止殺青所編百有八十餘家矣  
迄至魏晉作者間出調言兼存珠語必錄類聚而求  
亦充箱照軫矣然繁辭雖積而本體易總述道言治  
枝條五經其純粹者入矩躡駁者出規禮記月令取  
乎呂氏之紀三年問喪寫乎荀子之書此純粹之類

也若乃湯之問棘云蚊曉有雷霆之聲惠施對梁王  
云蝸角有伏尸之戰列子有移山跨海之談淮南有  
傾天折地之說此躡駁之類也是以世疾諸混洞  
虛誕按歸藏之經大明迂恠乃稱弄彈斃十日姮娥奔  
月殷湯如茲况諸子乎至如商韓六虱五蠹棄孝廢  
仁轅藥之禍非虛至也公孫之白馬狐犢辭巧理拙  
魏牟比之鷄鳥非妄貶也昔東平求諸子史記而漢  
朝不與蓋以史記多兵謀而諸子雜詭術也然洽聞  
之士宜撮綱要覽華而食實棄邪而採正極睇參差  
亦學家之壯觀也研夫孟荀所述理懿而辭雅管晏



屬篇事覈而言練列御寇之書氣備而采竒鄒子之  
說心奢而辭壯墨翟隨巢意顯而語質尸佼尉繚術  
通而文鈍鶡冠綿綿亟發深言鬼谷渺渺每環其義  
情辨以澤文子擅其能辭約而精尹文得其要慎到  
折密理之巧韓非著博喻之富呂氏鑒遠而體周淮  
南汎採而文麗斯則得百氏之華采而辭氣文之大  
畧也若夫陸賈新語賈誼新書揚雄法言劉向說苑  
王符潜夫崔寔政論仲長昌言杜夷幽求或叙經典  
或明政術雖標論名歸乎諸子何者博明萬事爲子  
適辨一理爲論彼皆蔓延雜說故入諸子之流夫自

六國以前去聖未遠故能越世高談自開戶牖兩漢  
以後體勢浸弱雖明于坦途而類多依採此遠近之  
漸變也嗟夫身與時舛志共道申標心於萬古之上  
而送懷於千載之下金石靡矣聲其銷乎

贊曰

丈夫處世懷實挺秀辨雕萬物智周宇宙立德何隱  
含道必授條流殊述若有區囿

校十四字

漢書藝文志伊尹五十一篇力牧二十二篇註六

國時所作託之力牧力牧黃帝時相

高氏魏相奏記霍光曰文王見鬻子年九十餘文  
子曰噫老矣鬻子曰君若使臣捕武逐麇臣已老

矣使坐策國事臣年尚少文王善之  
史記老子姓李氏名耳字伯陽楚苦縣人孔子適



周問禮於老子謂弟子曰老子其猶龍耶老子見周之衰遂去至關關令尹喜曰子將隱矣強為我著書乃著書上下篇言道德之意五千餘言

史記莊子蒙人名周嘗為漆園吏著書十餘萬言史記墨翟宋大夫善守禦為節用藝文志墨子七十一篇

劉向別錄尹文子學本莊老其書自道以至名自名以至法以名為根以法為柄凡二卷僅五千言漢書藝文志野老十七篇應劭註年老而居田野相民之耕種故號野老

史記齊有三騶子而騶衍者深觀陰陽消息而作恠迂之變終始大聖之篇十餘萬言

史記申不害京人相韓昭侯學本黃老而主刑名著書二篇

史記商君名鞅為秦孝公左庶長已而相秦後為公子虔之徒所告車裂以殉著書二十九篇

史記蘇秦習之於鬼谷先生徐廣註潁川陽城有鬼谷蓋是其人所居因以為號

劉向別錄楚有尸子疑其在蜀今案尸子書晉人名佼秦相衛鞅客鞅誅佼恐逃入蜀著書二十篇

漢書藝文志青史子五十七篇註古史官記事之書小說家也

漢書成帝使謁者陳農求遺書於天下詔光祿大夫劉向等校之向卒哀帝復使歆卒父業歆總群書奏為七畧輯畧六藝畧諸子畧詩賦畧兵書畧術數畧方伎畧

周禮

周禮

周禮

周禮

周禮

周禮

周禮

周禮

周禮

周禮



故曰歸藏

歸藏易坤開筮云帝堯降二女以舜妃又羿彈十日又昔常娥以西王母不死之藥服之遂奔月為月精

商子弱民第二十農商官三者國之常食官也農關地商致物官法民三官生蠶六曰歲曰食曰美

曰好曰志曰行六者有樸必削

史記韓非者韓之諸公子秦攻韓韓遣非使秦李斯害之下吏治非使人遺非藥使自殺非五蠹篇

學者言古者帶劍者近御者及商工之民此五者浮言亂政邦之蠹也

史記荀卿傳趙亦有公孫龍為堅白同異之辨漢書東平王宇宣帝之子成帝時來朝上書求諸

子及太史公書大將軍王鳳以諸子書或及經術或明鬼神太史公書有戰國縱橫之謀不許

史記管仲夷吾者穎上人為齊相著書八十六篇史記晏嬰者萊之夷維人為齊相著書七篇載其

行事及諫諍之言世號晏子春秋漢書藝文志列子八篇註名禦寇先莊子莊子稱

之隨巢子六篇註墨翟弟子尉繚子三十一篇馬

總云尉繚姓繚名首篇稱梁惠王問蓋魏人鶡冠子一篇註楚人居深山以鶡為冠文子九篇晁補之

云文子姓辛號計然受業老子史記慎到趙人著十二論

漢書淮南王劉安招致賓客方術之士作為內書二十一

史記高帝謂陸賈曰試為我著秦所以失天下吾所以得之者及古成敗之國賈凡著十二篇每奏

一篇帝未嘗不稱善左右呼萬歲稱其書曰新語漢書藝文志賈誼新書八卷

漢書揚雄見諸子各以其知舛馳雖小辨終破大道故人時有問雄者常用法應之撰以為十三卷

象論語號曰法言漢書劉向校秘書探古今紀傳行事之疏正辭美

義可為勸戒者以類相從為說苑二十卷後漢書王符字節信安定人耿介忤俗隱居著書

以譏當時失得不欲顯其名故號潜夫後漢書崔寔字子真瑗之子也桓帝初為郎明於

政體論當世便事數十條名曰政論後漢書仲長統字公理山陽高平人叅丞相曹操

後漢書仲長統字公理山陽高平人叅丞相曹操

後漢書仲長統字公理山陽高平人叅丞相曹操



軍事每論說古今及時俗行事恒發憤歎息因著  
論名曰昌言  
晉書杜夷字行齊廬江人懷帝時舉方正著幽求  
子二十篇

### 論說第十八

聖世彛訓曰經述經叙理曰論論者倫也倫理有無  
聖意不墜昔仲尼微言門人追記故仰其經目稱爲  
論語蓋群論立名始於茲矣自論語已前經無論字  
六韜二論後人追題乎詳觀論體條流多品陳政則  
與議說合契釋經則與傳注參體辨史則與贊評齊  
行銓文則與叙引共紀故議者宜言說者說語傳者  
轉師注者主解贊者明意評者平理序者次事引者  
胤辭八名區分一揆宗論論也者彌綸群言而研一  
理者也是以莊周齊物以論爲名不常春秋六論昭



列至石渠論藝白虎通講聚述聖言□□通經論家  
之正體也及班彪王命嚴尤三將敷述昭情善入史  
體魏之初霸術兼名法傳韓王粲校練名理迄至正  
始務欲守文何晏之徒始盛玄論於是聘周當路與  
尼父爭塗矣詳觀蘭石之才性仲宣之去伐叔夜之  
辨聲太初之本玄輔嗣之兩例平叔之二論並師心  
獨見鋒穎精密蓋人倫之英也至如李康運命同論  
衡而過之陸機辨亡效過秦而不及然其美矣次及  
宋岱代郭象蒙銳思於機神之區夷甫裴頠交辨於有無  
之域並獨步當時流聲後代然滯有者全繫於形用

貴無者專守於寂寥徒銳偏解莫詣正理動極神源  
其般若之絕境乎逮江左群談惟玄是務雖有日新  
而多抽前緒矣至如張衡譏世韻似俳說孔融孝廉  
但談嘲戲曹植辨道體同書抄才不持論寧如其已  
原夫論之爲體所以辨正然否窮有數追無形迹堅  
求通鈎深取極乃百慮之筌蹄萬事之權衡也故其  
義貴圓通辭忌枝碎必使心與理合彌縫莫見其隙  
辭共心密敵人不知所乘斯其要也是以論如析薪  
貴能破理斤利者越理而橫斷辭辨者反義而取通  
覽文雖巧而檢跡如妄唯君子能通天下之志安可



以曲論哉若夫注釋爲詞解散論體襍文雖異總會  
是同若秦延君之注堯典十餘萬字朱普之解尚書  
三十萬言所以通人惡煩差學章句若毛公之訓詩  
安國之傳書鄭君之釋禮王弼之解易要約明暢可  
謂式矣說者悅也允爲口舌故言資悅懌過悅必僞  
故舜驚讒說說之善者伊尹以論味隆殷太公以辨  
釣興周及燭武行而紆鄭端木出而存魯亦其美也  
暨戰國爭雄辨士雲踊從橫參謀長短角勢轉丸騁  
其巧辭飛鉗伏其精術一人之辨重於九鼎之寶三  
寸之舌強於百萬之師六印磊落以佩五都隱賑而

封至漢定秦楚辨士弭節鄴君旣斃於齊鑊蒯子幾  
入乎漢鼎雖復陸賈籍甚張釋傳會杜欽文辨婁護  
脣舌頡頏萬乘之階抵噓公卿之席並順風以託勢  
莫能逆波而泝洄矣夫說貴撫會弛張相隨不專緩  
頰亦在刀筆范睢之言事李斯之止逐客並煩情入  
機動言中務雖批逆鱗而功成計合此上書之善說  
也至於鄒陽之說吳梁喻巧而理至故雖危而無咎  
矣敬通鮑鄧事緩而文繁所以歷聘而罕遇也凡說  
之樞要必使時利而義貞進有契於成務退無阻於  
榮身自非譎敵則唯忠與信披肝膽以獻主飛文敏



以濟辭此說之本也而陸氏直稱說熒擘以譎誑何哉

贊曰

理形於言叙理成論詞深人天致遠方寸陰陽莫貳

鬼神靡遜說爾飛鉗呼吸沮勸

校十四字

六韜霸典文論文師武論  
莊子內篇齊物論

呂氏春秋開春慎行貴直不苟以順士容六論

後漢書翟酺傳孝宣論六經於石渠註甘露三年

詔諸儒講五經兼平公羊穀梁同異上親臨決焉  
時更崇穀梁故言六經

後漢書章帝建初四年詔諸王諸儒會白虎觀講

議五經同異帝親臨稱制如石渠故事命史臣著  
為白虎通德論

後漢書隗囂據隴蜀問班彪曰往者周末戰國并

爭天下分裂意者縱橫之事復起於今乎彪乃作

王命論以明神器不可妄覲以諷之

漢書王莽傳大司馬嚴尤非莽攻伐四夷數諫不

從乃著古名將樂毅白起不用之意及言邊事凡

三篇以風諫莽通志嚴尤三將軍論一卷

魏志傳嘏字蘭石北地人以平母丘儉功封陽鄉

侯常論才性異同鍾會集而論之

通志王粲去伐論三卷

稽中散集聲無哀樂論以殊方異俗歌哭不同使

錯而用之或聞哭而歡或聞歌而戚斯非音聲之

無常者乎

魏志夏侯玄字太初譙郡人累遷散騎常侍通志

湛新論十卷

魏志鍾會與山陽王弼並知名弼字輔嗣為尚書

郎注周易老子又著易畧例老子畧例

世說何平叔註老子未畢見王弼自說其旨何意

多所短遂不復註因作道德二論

魏氏春秋李康字蕭遠中山人文選康運命論

後漢書王充字仲任上虞人著論衡中有命祿篇

又命義篇故劉孝標辨命論云仲任蔽其源子長



聞其惑 晉書陸機年二十而吳滅以祖父世為吳將相有大勳於江表深慨孫皓舉而棄之乃論權所以得皓所以亡又欲述其祖父功業作辨亡論二篇

文選賈誼過秦論 通志晉荊州刺史宋岱通易論一卷王海云郭象

注

晉書郭象字子玄河內人東海王越引為太傅主簿初向秀注莊子大暢玄風秀卒子幼象遂竊為已注

晉書王衍字夷甫琅邪人蚤知名以清虛通理稱歷官太尉

晉書裴頠字逸民河東聞喜人善言名理歷官侍中

晉諸公贊自魏太常夏侯玄等皆著道德論後進庾敳之徒希慕簡曠裴成公疾世俗尚虛無之理

作崇有二論以折之時人莫能難惟夷甫來理如小屈時人即以王理難裴理還復申

曹子建集辨道論大畧以左慈郝儉方士之徒奸詭欺衆言不足信也

漢書儒林傳小夏侯之書張山拊以授秦恭恭字延君增師法至百萬言桓譚新論秦延君但說粵

若稽古即三萬言 漢書儒林傳歐陽章句平當授朱普為博士桓榮

受朱普章句四十萬言 漢書毛公趙人治詩為河間獻王博士

漢書孔氏有古文尚書孔安國以今文字讀之起家為漢武帝博士

後漢書鄭玄字康成北海人徵為大司農以病自免玄注周易尚書等凡百餘萬言

易係辭兌為口兌彖曰兌說也 書舜典帝曰龍朕暨讒說殄行震驚朕師命汝作

納言夙夜出納朕命惟允 呂氏春秋伊尹說湯以至味曰凡味之本水最為

始火之為紀時疾時徐滅腥去臊除羶必以其勝無失其理

呂氏春秋呂尚坐茅以漁文王勞而問取尚曰魚求於餌乃牽其緡人食於祿乃服于君以餌取魚

以祿取人以小釣釣川而擒其魚以中釣釣國而擒其萬國諸侯



越國以鄙遠君知其難也馬用亡鄭以倍鄰鄰之

厚君之薄也秦伯說與鄭盟而退晉亦去之

史記田常欲作亂而憚高國鮑晏故移其兵伐魯

子貢說曰不如伐吳伐吳不勝民人外死大臣內

空孤主制齊者惟君也田常曰善

莊子徐無鬼市南宜僚弄丸而兩家之難解

鬼谷子書飛鉗篇謂語飛而鉗以待之

史記毛遂與平原君定從而歸至趙平原君曰毛

先生一至楚而使趙重于九鼎大呂毛先生以三

寸之舌強于百萬之師

史記蘇秦為從約長并相六國嘆曰使我有洛陽

負郭田二頃吾豈能佩六國相印乎

史記酈食其者高陽人事漢高為廣野君說齊下

七十餘城已而韓信襲齊齊王廣以酈生賣已遂

烹之

史記淮陰侯臨刑嘆曰悔不用蒯通之計乃為兒

女子所詐豈非天哉高祖曰是齊辨士也召欲烹

之通曰秦失其鹿天下共逐之欲為陛下所為者

甚衆願力不能耳又可盡烹之耶乃置之

漢書陸賈游漢廷公卿間名聲藉甚

請大將軍幕府國家政謀王鳳常與欽慮之

漢書婁護字君卿精辨論議與谷子雲俱為五侯

上客長安號曰谷子雲筆札婁君卿喉舌

史記范雎魏人字叔從王稽入秦以穰侯越韓魏

而伐齊乃上書曰臣聞善厚家者取之于國善厚

國者取之于諸侯天下有明主則諸侯不得擅厚

者何也為其割榮也卒逐穰侯為秦相

史記李斯上蔡人入秦拜客卿會鄭國以作渠事

覺大臣請一切逐客斯亦在逐中乃上書請除逐

客之令

史記鄒揚齊人初事吳王濞王有逆謀陽奏書諫

後乃致其意吳王不聽去遊梁羊勝公孫詭疾陽

之後

因說曰將軍之先為漢信臣新室之興英俊不附



冊不能從  
文選陸機文賦奏平徹以閑雅說煇燁以譎誑

### 詔策第十九

皇帝御寓其言也神淵嘿黼辰而響盈四表唯詔策  
乎昔軒轅唐虞同稱爲命命之爲義制性之本也其  
在三代事兼誥誓誓以訓戎誥以敷政命喻自天故  
授管錫胤易之姤象后以施命誥四方誥命動民若  
天下之有風矣降及七國並稱曰令令者使也秦并  
天下改命曰制漢初定儀則命有四品一曰策書二  
曰制書三曰詔書四曰戒敕戒州邦詔誥百官制  
施赦命策封王侯策者簡也制者裁也詔者告也敕  
者正也詩云畏此簡書易稱君子以制數度禮稱明



君之詔書稱敕天之命並本經典以立名目遠詔近  
命習秦制也記稱絲綸所以應接群后虞重納言周  
貫喉舌故兩漢詔誥職在尚書王言之大動入史策  
其出如綍不反若汗是以淮南有英才武帝使相如  
視草隴右多文士光武加意於書辭豈直取美當時  
亦敬慎來葉矣觀文景以前詔體浮新武帝崇儒選  
言弘輿策封三王文同訓典觀戒淵雅垂範後代及  
制詔嚴助卽云厭承明廬蓋寵才之恩也孝宣璽書  
責博士陳遂亦故舊之厚也逮光武撥亂留意斯文  
而造次喜怒時或偏濫詔賜鄧禹稱司徒爲堯敕責

侯霸稱黃鉞一下若斯之類實垂憲章暨明帝崇學  
惟詔間出安和政弛禮閣鮮才每爲詔敕假手外請  
建安之末文理代興潘勗九錫典雅逸群衛凱禪誥  
符命炳耀弗可加也自魏晉誥策職在中書劉放張  
華牙管斯任施命發號洋洋盈耳魏文下詔辭義多  
備至於作威作福其萬慮之一弊乎晉氏中興唯明  
帝崇才以溫嶠文清故□□中書自斯以後體慮風  
流矣夫王言崇祕大觀在上所以百辟其形刑萬邦作  
孚故授官選賢則義炳重離之輝優文封策則氣含  
風雨之潤敕戒恒誥則筆吐星漢之華治戎燹伐則



聲有洊雷之威青災肆赦則文有春露之滋明罰敕  
法則辭有秋霜之烈此詔策之大畧也戒敕爲文實  
詔之切者周穆命郊登父受敕憲此其事也魏武稱作  
敕戒當指事而誥勿得依違曉治要矣及晉武敕戒  
備告百官敕都督以兵要戒州牧以董司警郡守以  
恤隱勒牙門以禦衛有訓典焉戒者慎也禹稱戒之  
用休君父至尊在三同極漢高祖之敕太子東方朔  
之戒子亦顧命之作也及馬援已下各貽家戒班姬  
女戒足稱母師也教者效也言出而民效也契敷五  
教故王侯稱教昔鄭弘之守南陽陽條教爲後所述乃  
事緒明也孔融之守北海文教麗而罕於理乃治體  
乖也若諸葛孔明之詳約庾稚恭之明斷並理得而  
辭中教之善也自教以下則又有命詩云有命在天  
明爲重也周禮曰師氏詔王爲輕命令詔重而命輕  
者古今之變也

贊曰

皇王施令寅嚴宗誥我有絲言兆民尹好輝音峻舉

鴻風遠蹈騰義飛辭煥其大號

校七字

書胤征惟仲康肇位四海胤侯命掌六師義和廢  
厥職酒荒于厥邑胤侯承王命徂征  
易天下有風始后以施命誥四方  
詩出車豈不懷歸畏此簡書



書帝庸作歌曰救天之命惟時惟幾

禮記王言如絲其出如綸王言如綸其出如紉

漢官儀尚書唐虞官也龍作納言詩云惟仲山甫

王之喉舌秦改稱尚書漢亦尊此官典機密也

易渙九五渙汗其大號渙王居無咎

史記武帝以淮南王安善為文辭每為報書使相

如等視草乃遣

後漢書隗囂負客掾史多文學生每所上事當世

士大大皆諷誦之故帝有所辭答尤加意焉

史記武帝元狩六年廟立皇子閔為齊王旦為燕

王胥為廣陵王初作誥司馬遷贊云天子恭讓群

臣守義文辭爛然甚可觀也

漢書嚴助會稽吳人嚴夫子也或言族子也以

對策擢中大夫出為會稽太守武帝賜書曰制詔

會稽太守君厭承明之廬勞侍從之事出為郡吏

間者濶焉久不聞問具以春秋對

漢書陳遵傳遵祖父遂宣帝微時與有故相隨博

奕數負進及帝即位遂稍遷至太原太守乃賜遂

璽書曰制詔太原太守官尊祿厚可以償博進矣

後漢書光武以關中未定而鄧禹久不進兵救曰

司徒光也亡賊桀也當以時進討鎮慰西京係百

姓之心

後漢書司徒侯霸薦前梁令閻楊楊素有譏議帝

常嫌之既見霸奏大怒賜霸璽書曰崇山幽都何

可偶黃鉞一下無處所欲以身試法耶

後漢書明帝諱莊光武第四子在位十八年

後漢書和帝諱肇章帝之子在位十七年

後漢書安帝諱祐清河王慶之子殤帝崩鄧太后

立之在位十九年

魏志潘勗字元茂中牟人歷官尚書右丞

魏志獻帝建安十八年使御史大夫郗慮持節策

命曹操為魏公加九錫策文潘勗之辭也

魏志衛凱字伯儒河東人魏國建拜侍中文帝徙

為尚書凱勸贊禪代之義為文誥之詔

魏志劉放字子棄涿郡人與太原孫資俱為秘書

郎放善書檄三祖詔命多放所為

晉書明帝諱紹元帝太子在位三年帝欽賢好客

雅愛文辭當時名臣自王導庾亮等咸見親待

穆天子傳丙寅天子效噐乃命正公郊父受勅憲

文雅唯龍

卷之四

三



用伸口八駿之乘以飲於枝詩之中

書大禹謨戒之用休董之用威  
古文苑載漢高帝敕太子云吾遭亂世當秦禁學  
自喜謂讀書無益洎踐阼以來時方省書乃使人  
知作者之意追思昔所行多不是又汝見蕭曹張  
陳諸公與吾同時人皆拜之

漢書東方朔贊朔戒其子以尚容曰首陽為拙柱  
下為工依隱玩世詭時不逢

後漢書馬援戒兄子嚴敦曰吾欲汝曹聞人過失  
如聞父母之名耳可得聞口不可得言也好論議  
人長短妄是非正法此吾所大惡汝曹知吾惡之  
甚矣所以復言者施衿結襦申父母之誠欲使汝  
曹不忘之耳

後漢書扶風曹世叔妻同郡班彪之女也名昭博  
學高才著女戒七篇

漢書鄭弘字穉卿太山剛人為南陽太守條教法  
度為後所述

司馬彪九州春秋孔融守北海教令辭氣溫雅可  
玩而誦論事考實難可施行

晉書庾翼字稚恭潁川人歷位南郡太守

### 檄移第二十

震雷始於曜電出師先乎威聲故觀電而懼雷壯聽  
聲而懼兵威兵先乎聲其來已久昔有虞始戒於國  
夏后初誓於軍殷誓軍門之外周將交刃而誓之故  
知帝世戒兵三王誓師宣訓我衆未及敵人也至周  
穆西征祭公謀父稱古有威讓之令有文告之辭即  
檄之本源也及春秋征伐自諸侯出懼敵弗服故兵  
出須名振此威風暴彼昏亂劉獻公之所謂告之以  
文辭董之以師武者也齊桓征楚告菁茅之闕晉厲  
伐秦責箕郤之焚管仲呂相奉辭先路詳其意義即



今之傲文暨乎戰國始稱爲檄檄者皦也宣露於外  
皦然明白也張儀檄楚書以尺二明白之文或稱露  
布播諸視聽也夫兵以定亂莫敢自專天子親戎則  
稱龔行天罰諸侯御師則云肅將王誅故分闡推轂  
奉辭伐罪非唯致果爲毅亦厲辭爲武使聲如衡風  
所繫氣似攬搶所掃奮其武怒總其罪人徵其惡稔  
之時顯其貫盈之數搖奸宄之膽訂信慎之心使百  
尺之衝摧折於尺書萬雉之城顛墜於一檄者也觀  
隗囂之檄亡新有其三逆文不雕飾而辭切事明隴  
右文士得檄之體矣陳琳之檄壯有骨鯁雖姦闇携

養章密太甚發丘摸金誣過其虛然抗辭書曩皦然  
露固矣敢指曹公之鋒幸哉免袁黨之戮也鍾會  
檄蜀徵驗甚明桓公檄胡觀釁尤切並壯筆也凡檄  
之大體或述此休明或叙彼苛虐指天時審人事筭  
強弱角權勢標著龜於前驗懸鑿鑑於已然雖本國  
信實參兵詐譎詭以馳旨熇擘以騰說凡此衆條莫  
或違之者也故其植義颺辭務在剛健插羽以示迅  
不可使辭緩露板以宣衆不可使義隱必事昭而理  
辨氣盛而辭斷此其要也若曲趣密巧無所取才矣  
又州邦徵吏亦稱爲檄固明舉之義也移者易也移



風易俗令往而民隨者也相如之難蜀老文曉而喻博有移檄之骨焉及劉歆之移太常辭剛而義辨文移之首也陸機之移百官言約而事顯武移之要者也故檄移爲用事兼文武其在金革則逆黨用檄煩命資移所以洗濯民心堅用符契意用小異而體義大同與檄參伍故不重論也

贊曰

三驅弛網九伐先話肇鑑吉凶著龜成敗摧壓鯨鯢

抵落蜂虿移寶易俗草偃風邁

校五字 四卷共校五十七字

司馬法有虞氏戒于國中欲民體其命也夏后氏誓于軍中欲民先成其慮也殷誓于軍門之外欲

民先意以待事也周將交刃而誓之以致民志也國語周穆王將征犬戎祭公謀父諫曰先王耀德不觀兵故有威讓之命有文告之辭春秋左傳晉侯使叔向告劉獻公曰抑齊人不盟若之何對曰盟以底信君苟有信諸侯不二何患焉告之以文辭董之以武師雖齊不許君庸多矣春秋左傳齊侯以諸侯之師伐楚曰爾貢包茅不入王祭不共無以縮酒寡人是徵春秋左傳晉侯使呂相絕秦曰入我河縣焚我箕部我是以輔氏之聚史記張儀嘗從楚相飲相亡璧意儀盜之掠笞數百及儀相秦爲檄告楚相曰吾從汝飲不盜汝璧善守汝國吾且盜汝城後漢書隗囂字季孟天水成紀人與隗崔等舉兵移檄郡國曰王莽慢侮天地悖道逆理下三萬六千歲之歷是其逆天之大罪也行炮烙之刑除順時之法龍是其逆地之大罪也文選袁紹伐許陳琳爲紹檄豫州曰司空曹操祖父中常侍騰與左悺徐璜並作妖孽父嵩乞匄携



養因賊假位又特置發丘中郎將摸金校尉所過  
隙突無骸不露魏志紹敗琳歸太祖太祖謂曰卿  
昔為本初移書但可罪狀孤而已惡惡止其身何  
乃上及父祖耶琳謝罪太祖愛其才而不咎

魏志鍾會字士季繇之少子也景元四年伐蜀檄  
曰蜀侯見禽于秦公孫授首于漢此皆諸公所備  
聞也明者見危于無形智者規福于未萌豈晏安  
鴆毒懷祿而不變哉

藝文類聚桓温北伐檄石勒曰胡賊石勒暴肆華  
夏齊民塗炭至使六合殊風九鼎乖越寡人不德  
忝荷戎重先順者獲賞後伏者蒙誅此之風範想  
所聞也

漢書司馬相如為中郎將使蜀蜀長老多言通西  
南夷之不為國用相如業已建之不敢諫乃假蜀  
父老為辭而以已意難之

漢書劉歆欲立左氏春秋及毛詩逸禮古文尚書  
皆列于學官哀帝令與五經博士講論其義諸博  
士或不肯置對歆因移書太常責讓之

文心雕龍訓故卷之四終

揚國俊寫  
魏文良刊



